

INUIT ATAQATIGIIT

Inatsisartuni



30-04-2019

FM2019/122

Allanguut

Siunnersuut 23-01-2019-meersoq taarserpaa

(Allangortinneqarpoq siunnersuummi kalaallisuuani taasissutissap qulequtaa)

Inatsisartut Suleriaasianni § 33 naapertorlugu matumuuna aalajangiiffigisassatut siunnersuut una saqqummiuppara:

**Naalackersuisut kingusinnerpaamik UPA2020-mi Kalaallit Peqqissartut
Angerlarsimaffianni kalaaliminernik atuinerup qanoq iliorluni
annertusineqarsinnaanera pillugu misissuinermik suliaqarnissaat pillugu
Inatsisartuni aalajangiiffigisassatut siunnersuut. Misissuinermi - ajornangippat -
igaffissuarmi igaat kalaaliminersunninnerat qanoq ililluni annertunerulersinnaanera
pillugu kaammattuuteqarfigineqassaaq.**

(Inatsisartunut ilaasortaq Stine Egede, Inuit Ataqatigiit)

Tungavilersuut:

Nerisaqarneq napparsimanermi katsorsaanerup ilagaa pingaarutilik - ingammik perulullutik napparsimasunut. Perululluni napparsimaneq amerlanertigut nererusunnginnermik nassataqartarpoq, tamannalu napparsimasup suli peqqinnginnerulerneranik nassataqarsinnaavoq. Nerisassat tikkat, isikkuat ilusaallu nererusussuseqalersitsisartuni pingaarnernut ilaapput.

Napparsimasut amerlasuut inuunermi aatsaat siullermeerlutik Qallunaat Nunaanniittarput. Nerisassallu peqqissartut angerlarsimaffianniinnermi angerlarsimasutut misigititsinermut ilapittuutaasinnaapput, taamaalilluni napparsimasoq naak angerlarsimaffimmit ungasissorsuarmiikkaluarluni toqqissisimanermik misigisinnaaqqullugu.

Ukiut ingerlaneranni Kalaallit Peqqissartut inaanni nerisaqarneq amerlasooriarluni naammagittaalliutaasarpog. Taamaammallu nerisassat sassaalliutigineqartut pitsaassusaasa eqqummariffigineqarnerulernissaat pisariaqartinneqarpoq.

Sapaatip akunneranut marloriarluni pingasoriarluniluunniit kalaaliminernik sassaallertoqartarnera ulloq 21. januar 2019 § 37 naapertorlugu apeqqummut akissummi atuarneqarsinnaavoq. Taakkulu saniatigut sapaatip akunneranut marloriarluni napertunik qallersukkanillu sassaallertoqartarpoq. Massakkut peqqissartut inaanni kalaaliminersiniutissatut 400.000 kr-it immikkoortinneqartarput. Nerisassanik sungiusimasanik piumaneqarnerusunillu napparsimasut piumasaqarnerannik naammassinninnissamut peqqissartut inaat piareersimasoq, tassungalu atatillugu peqqisartut isumassarsiorfigineqartarlutillu akussatut kissaataannik apersorneqartartut ilanngullugu atuarneqarsinnaavoq.

Tamakkuli suli pitsaanerusinnaasut isumaqarpunga. Assersuutigalugu igasunut igasunullu ikiortinut Kalaallit Nunaanni namminersorlutik inuussutissarsiortuni pikkorissartitsinertigut misilittakkanilluunniit avitseqatigiinnertigut. Nerisassani sassaalliutigineqartuni kalaalerpaluutit kiisalu kalaaliminernik iganermi ilisimasat ataavartumik ineriartortinneqartariaqarput, ajornangippat INUILI suleqatigalugu, taamaalilluni nerisassat sassaalliutigineqartut kalaaliminersunnissinnaaqullugit.

Eqqaamassavarpummi angerlarserneq nerisanik ilitsoqqussanik nerinikkut minnerulersinneqarsinnaammat.

Pisortanut aningaasatigut allaffissornikkullu kinguneqaatit:

Misissuinernik suliaqarneq AC-fuldmægtigip ukiup affaani sulineranik naleqassaaq, tassa 250.000 kr-it missaannik. Tamatumani nutarterinernut, atorfinitsitsinerni akisarsianut kiisalu allanut misissuinerit ilaatinneqanngillat, taakkumi Naalakkersuisut siunnersuusiorteranni ilanngunneqarumaartut naatsorsuutigineqarmat.

Namminersortunut aningaasatigut allaffissornikkullu kinguneqaatit:

Soqanngilaq

Innuttaasunut aningaasatigut allaffissornikkullu kinguneqaatit:

Siunnersuut innuttaasunut aningaasatigut kinguneqaateqassanngilaq, peqqissartullu angerlarsimaffianni nerisagissaarnerulerneq peqqissartut ilorrisimaarnerannik annertunerulersitsissasoq naatsorsuutigineqarpoq.